

南野堂筆記

辛亥季冬
施清署篆

第2本

卷4-6

南野堂筆記目錄

卷四

茹素戒殺詩文述

孫香泉詩錄

錄金壽門題瘦馬圖詩

錄周載軒扇頭詩句

登州海市詩述

憶錄蒲扇賦

憶錄贈歌者王菰兒小賦

桐城汪氏兄弟詩述

桐溪朱春橋詩述

追憶吳門共集曲牌名事

錄崑山徐閬齋詩述

贈顧旭東詩

吳門張映山詩述

追錄示毛童子詩

追錄題顧樊桐詩集序

述錄樊桐詩貴一氣說

卷五

述錄專葺說

東津讀書堂示兒作

張良辟穀說

與道士黃鶴論詩說

摘錄錢擇石詩集

述錄富陽單斗南詩

贈錢唐朱亦錢詩述

錢唐徐香巖詩錄

華亭高韻甫詩錄

同里沈蒙泉詩錄

桐城方南堂詩錄

錄曾稽商寶意詩句

錄揚州王少林詩

錄揚州閔蓮峯詩

錢唐應叔雅詩錄

錄揚州吳梅查古風詩

錄吳暮橋詩述

揚州馬恭壽送行詩錄

摘錄王雲上 召試詩

詠瓢兒菜詩述

錄如皋姜簫廷桃花扇傳奇詩

錄金陵僧鏡澄詩述

錄金陵張鴻雪詩句

與袁簡齋太史論文說

述錄武昌撫幕山館詩

錄惠瑤圃中丞題贈王蓬心詩述

又錄蓬心太守詩

王小蓬詩錄

影山賞菊詩錄

卷六

錄江東盧垓父詩

摘錄錢唐吳穀人詩

金陵周幔亭詩錄

毘陵錢素園詩錄

武昌寄袁簡齋太史詩

補錄鄂城寄兒詩

送周紉蘭東歸詩述

述錄七言絕句詩

錄邗江洪樾林江鄭堂詩述

節錄太倉王瀉夫詩句

吊歙人李某詩述

壽吳南池母夫人詩述

錄儀徵處士方竹樓詩句

題贈如皋石漁村詩錄

錄王蓬心太守詩句

醉題南野堂詩錄

述錄項直菴詩句

詠新月詩述

錄汪大紳詩集題跋語

節錄惠瑤圃中丞宜昌致書

詩教說

錄江右吳白菴虎邱詩

錄吳門沈菜園贈朱六橋詩

呈錢籜石長歌紀事述

錄陽湖毛洋溟詩句

錄漢陽張司馬詩句

與揚州金棕亭論詠物詩述

錄金陵周築東詠柳絮句

追錄金陵某翰林黃州詩句

錄王夢樓賀新婚聯語

錄徐閬齋孝廉贈袁太史詩述

錄周築東孤山絕句詩

追錄楊二農朱六橋詩述

摘錄惠瑤圃中丞詩

摘錄朱六橋諸人詩句

錄長懋亭侍讀幼年對月詩

漢陽張恆齋司馬詩錄

追錄楚中新年書感詩事

論蜀中山水事

南野堂筆記卷四

稿李吳文溥澹川譔

古歙方正澍子雲定

茹素之說。儒者弗尚。然戒殺自能種德。茹素亦實在有味。養生家謂一切蔬菜。細嚼之。皆足以滋潤臟腑。絕勝肥醲腐腸也。蘇長公擷菜詩自序云。吾借王參軍地種菜。不及半畝。而吾與過子終年飽菜。夜半飲醉。無以解酒。輒擷菜煮之。味含土膏。氣飽風露。雖梁肉不能過也。人生須底物。而更貪耶。詩云。秋來霜露滿東園。蘆菰生兒芥。有孫我與何曾同一飽。不知何苦食雞豚。僕在海東書院有句云。蘆菰切酥飽爛蒸。薑紅芥綠餐有加。門生螃蟹何必議。腐儒麤糲真堪誇。又在金陵食瓢兒菜云。滑於蓴菜嫩於菰。淡泊中含滋味豐。為爾忘歸煩地主。轉思求益累園公。近家穀人太史冬菜詩備詳方法。江鄉風味。令人流涎。詩云。旨蓄三冬記。園官供可能。薦辛盤裏未抽甲。雨中曾液引渠流。注肥經土氣蒸。青蟲饑食葉黃蝶。瘦穿脰好藉濃霜壓。全憑夕照登。多情成把送。求益足斤稱。擇地攤千本。當風挂一繩。甕材隨處覓。鹽價應時增。丁例埋塵窖。清饒出酒燈。咬根宜我輩。食淡比山僧。美味甘於肉。寒聲脆似冰。茅檐逢歲晚。此色正須矜。長洲孫香泉明經名雲桂著。戒殺文云。西方氏之大戒曰。殺。

吾請舉儒道而證之。天惡殺曰陰。常居大冬而積於空虛不用之地。地惡殺曰厚德載物。鬼神惡殺曰福善禍淫而未也。古帝王有之。堯惡殺曰鳥獸孳尾。舜惡殺曰疇若予上下草木鳥獸。禹惡殺曰驅蛇龍而放之菹。湯惡殺曰欲左者左。欲右者右。文王惡殺曰吁嗟乎騶虞而未也。古先師亦有之。周公惡殺曰驅虎豹犀象而遠之。孔子惡殺曰君賜生必畜之。孟子惡殺曰見其生不忍見其死。周子惡殺曰觀天地生物氣象。張子惡殺曰物吾與也。其他百家所載莫可殫述。人為萬物靈。靈以心耳。心之所以靈。靈於仁耳。心心習殺。殺心馴熟而善端悞。心心戒殺。悲心馴熟而善氣充。夫生一物而吾心與之俱生。死一物而吾心與之俱死。然則戒殺云者。獨愛物乎哉。正愛吾心之天也。且天以氣化生萬物。人亦一物也。推賦秉有獨全。故靈明有獨異。業以生人生物之理。全受之天。乃不能為天育萬物。獨忍為天戕萬物乎。既翹然為萬物之長。顧又悍然為萬物之蠹乎。天生之。我死之。天愛我以生。我賊物以死。物不敢怒。而天怒之。天怒之。而鬼神必怒之。嗚呼。亦危矣哉。夫天之大德曰生。夫子之大道曰恕。殺之非生明矣。己欲壽。己之父母欲壽。己之妻子欲壽。而物獨由我而使之。不壽。恕也乎哉。士君子不學佛可也。不學聖可乎。試窺兩大。攷六經。而荒言非創矣。其辭深切著明。附錄於此。為世俗勸懲自箴也。苟具人理存惻隱者。有不怛焉動於。

其中者乎。

香泉外和內介篤於倫紀古文謨述殊富詩多載道之言藹然儒者其五言如偕六
峯坐流水禪居云客來聊命酒酒罷叩松關塵夢不到處繞門流水閒空堂餘古衲
飛雨失遙山有會楞伽旨脩然獨自還題洪卷施寒樂永慕圖云母曰兒勤學兒言
母我師耐寒燈照讀失路鬢成絲冰雪留題日松楸永暮年恐君腸寸斷不敢問從前
菊花云豈是柴桑種疏籬正傲霜自全秋晚節猶帶晉時妝七言如中秋河上望月云
露華洗淨淡雲收萬里天香處處流故國共看今夜月離人偏戀去年秋鐘沉寺北
難成夢雁到江南為寄愁迴憶慈闈雙白鬢夜深猶自倚層樓贈毛海客云十年舊
雨本情親一笑偏驚棒檄人世謂功名例丞簿我憐豪客落風塵才因困頓藏芒角
詩助江山動鬼神手板腳韉君莫憾依劉還有布衣身贈永州太守王蓬心云柳柳
州餘繼此君愚溪天許狎羣鷗一官似鶴初離岫十指如山易出雲醉後陶情滌太
守畫中詩句鮑參軍風騷恰向尊前合泥飲休辭到夜分臨行送靈巖尚書展 觀
云述職趨朝拂路塵欣瞻雲日 帝城春大名世邁文昌運纘祖功崇弼亮臣三

歲晨昏容我去兩湖疾苦望公陳宗門敢效尋常祝珍重蒼生託命身舟行雜興十
首云沙平淺草柳痕齊新漲如油正拍隄天氣放晴雲活潑風聲作勢浪高低村因

日落漁莊閉。樹為烟濃鳥道迷。忽地香林清磬動。前灣知有古招提。其萬柳絲絲帶

纜牽。船牕小倚隱囊眠。岸移略似蛇趨壑。雲起還疑石補天。水枕徘徊成夢易。醉鄉

渾沌覺神全。此生信有煙霞癖。到處溪山結勝緣。其逢林潑翠野雲昏。處處江南烟

雨痕。釣艇半依紅蓼岸。人家全住綠楊村。衣裁小婦知絲熟。顏醉衰翁覺酒溫。雞犬

閒閒無一事。陪他笑語倚柴門。其暫與沙洲魚鳥親。居然也作薜蘿身。雲如不定天

涯客。山似無言太古民。烟起迷濛林乍遠。風恬熨貼浪初勻。輸他四季江湖樂。三尺

垂垂老釣綸。其平山堂懷古云。載月傳花邈勝遊。風流若箇許同儔。杭州蘇共蘇州

白。合併揚州太守歐。館餐云館餐慚媿萬錢餘。有客停杯意悵如。記得鱸鄉風味好。

拋他來食武昌魚。其他句如梅花云。影留一片太古雪。冷浸半溪何處雲。黃鶴樓云。

幾輩有詩題歲月。何人不負此江山。冬夜不寐云。此夜白頭人不寐。憶兒淚與憶孃

同。曉發云。敝裘似鐵霜初下。殘夢如烟雞亂啼。除夕云。慣向天涯逢此夕。劇憐身世

幾今宵。答廉船云。萬死戰場看月色。隻身瘴地聽秋聲。贈王蓬心云。畫疑北苑重逢

日。人憶東方小謫年。送春云。行蹤漂泊看如許。歸計輸他在客先。贈張冠卿云。爾我

春暉同未報。眠餐努力此天涯。庚戌除夕云。梅如處子知春淺。雪到殘年代月明。初

夏即事云。絮欲漫天春力盡。燕逢隔歲客年深。皆琅然清圓者也。

偶見錢唐金壽門先生題瘦馬圖詩云古戰場邊數箭瘢西風老馬憶桑乾而今衰草斜陽裏只作牛羊一例看讀之可歎

周載軒太史自蜀歸九江重晤於武昌節署見其扇頭有川東觀察松水王公書餞別詩二首風致絕佳記其一首云除日相逢意藹然腹腴書卷氣雲烟言尋山水詩人蹟住到鶯花倦客天劍外未經驅犂馬江干底事喚吳船從來勝地蘇黃後無此風流六百年觀察嘉善人與僕同郡向未謀面而心儀久矣

世傳登州海市望之為城郭為舍宇為人物諸幻云是蜃氣所結又岳麓志載陶侃守長沙山洞有蟒妖夜能吐舌為橋奮鬣為仗樹角為門熠目為炬其聲能為八音每歲七月望夕飛瞰樓上羽士以為真仙接引以一人齋沐俟昇其徒相率拜送侃至期觀之引弓射中其炬炬滅灑血如雨旦跡之巨蟒斃洞中剖其腹皆羽冠人骨是知山海輿區奇怪之類並能孕氣成形噓空結狀竊意如海外三神山碧城十二樓武彝幔亭漢臯戲珠及昔人所覩龍君龍女靈虛之宮金堂芝草真仙之宅皆蜃樓蟒炬比耳又如乘龍驂鸞控鶴馭處羽化冲霄之士見諸傳記者不一而足得非皆為妖神所攝如韓子謝自然詩所云噫乎彼寒女永托異物羣耶僕有游夢仙詩三首云珊珊瑣骨鬢猶青乍可餐霞餌茯苓真箇仙山如夢好只求長夢不求

醒一漫擬邯鄲道上游。人間富貴不須求。醒來滋味思量著。可有神仙在後頭。其間
說天曹有主持。神仙遭劫亦長辭。幾經碧海生塵日。總算黃梁未熟時。其要之同為
人類總在人寰。凡有異於人道者皆妖也。其或蘊真老壽至數百歲不死者。必其所
稟厚而所養深。乃天人自然之符。豈有變幻冲舉之事耶。僕在涇陽時。所見赤脚李
翁者。不知其幾何歲矣。與論心性之要。究死生之說。殊有心得。既而南歸。作古詩一
首并序。始末後數聯云。由來山澤臞脫。略區中緣稟氣。或殊衆守中良獨堅。神完骨
髓足。久耐饑與寒。與物無戾心。混混和其天。豈有不死理。亦在能自全。失性求長生。
其愚真可歎。茲錄其答永中堂手書。世之好道者。可以知其人焉。書云。乞人浪跡涇
干。嬾殘同類。不但岐黃之理。素未究心。即老莊之書。亦未寓目。惟知飢來出門。食後
靜坐而已。忽承慕道之誠。問以治病之術。大約養生即長生之方。混俗即脫俗之法。
天上神仙之府。人間宰相之家。一而二。二而一者也。必欲閉門辟穀。服藥燒丹。是即
道在邇而求諸遠。事在易而反諸難矣。鄙見如是。未審以為何如。至來京之約。不特
野心久戀白雲。抑且老病劇於秋葉。後會有緣。不必相強。澹川氏曰。翁介不絕俗。和
不累心。養真抱素。以清淨為歸趣焉。其所論說誠正平易。徒以山林老壽終士各有
志。又烏測其所以然哉。或曰。翁明李之隱。君子也。是或然矣。

僕少時喜作小賦。記蒲扇賦云：不羽不紈，天然雅素。地則茆舍繩牀，人則簪冠縷屨。墮片月於孤懷，寫涼颼於十步。翦數痕之秋水，飛一尺之春冰。荷蓋擎圓，分柄柄蕉紋畫界，分層層。爾乃徑訪求羊，門開將詎。逍遙披襟，揖讓兼塵。隔座對揮，清言如雨。至若北窗無人，南軒卓午。幽蟬曳枝，孤燕入戶。先生在夢，蝶衣栩栩。落手飄然，不知何許。或當倚杖蘭皋，迴舟蓮浦。火雲旁散，月華中吐。脫巾相呼，樵人漁父。灑灑絕俗，落落不苟。所以靡離煦渙，澈冽悠颼。含野韻於琴酌，引新籟於松篁。令人心神朗暢，眉宇清揚。何必御鮫泪之綃，展龍鬚之障。炊瑤池之米，浮玉碗之漿。始足振蒙蘇鬱，解暍招涼也哉。嗟乎，彼澤之蒲，根繁叢積。我取其材，惟用所適。或在車而為輪，思求賢之令辟。或示辱而為鞭，思刑措之嘉績。或承足而為屨，思山林焉匿跡。或薦寢而為簟，思偃息以終夕。豈若茲扇之閒逸蕭疎，自然標格。熱不因人，煩苛如釋。伊零霜之弱植，雖凋謝亦何惜。幸惠顧而提攜，得沾君之手澤。願奉揚乎清輝，被高風於無斲。

曩在虎邱舟中，贈歌者王崧兒小賦一首。書便面與之云：吳中歌者崧兒，便嬛妙齒，婉嬾工謳。迺沙棠兮共泛，藥玉兮同浮。甫停觴而揄袂，乍啟輔以舒喉。於是列座傾心，一聲動色。先奏綠水，後歌白雪。則見其舉體如仙，當眉若刻。既掩抑其多姿，亦宮

商之赴節。不勝幼眇之音。彌著恢矣之質。極勝韻於廣場。攬風流而欲絕。迨夫綺筵散影。華燭淒烟。蘭橈逝矣。繡被杳然。落花無聲。明月自憐。目成余兮。忽遠心悅。君兮未言。得同舟兮。今夕思攜手兮。何年嗟乎。聲音之道。感人深兮。昔桓子野每聞清歌。輒喚奈何。況復曲終言別。倍難為懷。我亦安能作太上忘情哉。又二絕句云。紅牙碧玉早春天。凡髻風流最妙年。恰好依人行坐處。山南山北草如烟。其歌喉清切。神仙下舞。袖霏微烟霧。迴愁殺娟娟。映江月。畫船銜尾一時開。其集中不錄。

桐溪汪氏兄弟。徙居秀水之金陀坊。長根溯名源。次左湖名湄。其季霽堂名濂。皆受業於先君子霽堂幼慧。尤為先君子所愛。與僕總角交歡。視同手足。霽堂嘗作拜月歌。有與君月下聯華萼。共祝姮娥鑒此情之句。又以初三月為酒令。僕先成令云。初三月。五一鈎。問何人。挂在柳梢頭。霽堂云。初三月。似指爪。半灣兒。招破青天表。僕續令云。初三月。影纖纖。學姮娥。眉樣兩頭共。霽堂亦續云。初三月。未分明。佳人睡起眼。纔醒相與大笑。不能復續矣。時共習帖括。夜各就牀讀文選。兩年無間。霽堂又耽於二氏之書。晨起輒手鈔多心經。竟卷乃啟扉。其後根溯先卒。霽堂亦久辭世。今惟左湖在耳。根溯之子亦天。有孫霽堂無子有女。左湖近僦屋城隍。其子寄食於其從弟小海之家。虎林者。十餘年矣。貧可知也。僕悼汪五濂云。卅角憐君最。寧馨十年同學。

媿趨庭夜深擁被讀文選早起焚香書道經筆硯弟兄深刻骨酒杯爾汝痛忘形此情此景如昨日春去春來墓草青過汪四湄城隍破屋書感云昔時兄弟惟君在今日友朋獨我來大厦已更他燕雀小扉深閉自莓苔都因寄食兒童瘦各為勞生鬢鬢催回首金陀讀書處生存零落總堪哀小海名淮詩格雋逸與僕亦撫塵之好也舊有秋江歌一首送其歸虎林云云見吳涇草

桐溪朱春橋明經文名方藹詩才清妙藹如其人畫擅梅花惟聞香氣移居我里之雙溪顏其室曰小山居與僕晨夕過從僕贈丈詩有桐影初流月琴聲不見人之句每一篇成丈輒嗟賞久之蓋與僕有同趣也嘗泛舟桐溪與丈同在其甥金鄂巖比部家之桐華館中消夏旬日而返鄂巖名德興好客工詞翰風神玉立所弄金石墨刻名人手蹟最富其友禦兒方蘭坻處士名薰畫臻神品詩長古風坐中尚有遠來名士數人一時風流佳會賓主東南都不作常語忽忽數年後復來桐溪則文化去處士病比部貧不能之官僕亦倦游就衰也因寄五律詩二首云東野孤傲骨西曹恬退心與余交有素論古意殊深見月思華燭因風寄玉琴久辜文酒會重惜鬢毛侵其曾共小山叟經過就閤眠桐華避暑處荷葉早涼天契闊勞生事風流記往年只今載書畫應少米家船其又寄七律一首云吟詩讀畫兩相歡有美東南并二難

處士避喧如避虎。主人求友勝求官。離筵竹葉腸先斷。高館桐華夢未闌。每枉佳書酬惡札。把余詩當白鷺看。蓋二子書法雙妙。僕輒以小札先之。博其數行書也。文有令子二人。長吟陔廣文。名鴻愷。次心畬。明經名鴻盛。並有俊才。心畬早卒。

僕寓吳門。毛氏與主人訥。葺榕坪。昆仲戴虛谷。妹倩。酒間聯吟射覆。無所不為。共集曲牌名。押韻成文。記其二十餘條云。金瓏璫步蟾宮。三學士喜相逢。玉芙蓉紅芍藥。真珠簾金絡索。黃鶯兒粉蝶兒。園林好賞花時。迎仙客賀新郎。銷金帳桂枝香。踏莎行。駐馬聽。意不盡。嚙林鶯。香柳娘步步嬌。醉扶歸。月兒高。縷縷金亭前。柳賞花時。沽美酒。好姐姐。賽觀音。五供養。稱人心。園林好。雙蝴蝶。浪裏來。雙鷓鴣。秋夜月。桂枝香。步蟾宮。舞霓裳。金梧桐。玉芙蓉。孤飛雁。一江風。謁金門。三學士。五更轉。朝天子。玉樓春。錦衣香。杯傾琥珀。月上海棠。逍遙樂。絳都春。阮郎歸。桃源憶故人。千秋歲。玩仙燈。普天樂。醉太平。賀聖朝。感皇恩。海棠春。似娘兒。傍粧臺。意遲遲。點絳脣。嬾畫眉。雁過沙川撥棹。秋夜月。收江釣。醉太平。漁家傲。脫布衫。金雞叫。真珠簾。一翦梅。疎影。銷金帳。罵王郎。薄倖。牧羊關。雁兒落。四邊靜。霜天曉角。搗練子。絡絲娘。縣撝絮。鍼線箱。一片錦。九迴腸。一封書。字字錦。望江南。意不盡。後有詩寄毛氏昆仲及戴經三首云。蓋憶之甚深也。

徐閔齋孝廉嵩崑山健菴司寇後人司寇藏書處曰傳是樓身後無貲產子孫散居他所故閔齋依外家寄籍金匱其詩不拘一格能道所歷善題目佳境過天一閣云寥落寒門傳是樓百年逝水變林邱虛勞聖主求書詔無復先臣手澤留饘粥

久荒拋簡冊子孫散處失松楸國恩數世難圖報躋躅經過涕泗流時開四庫館

上求傳是樓遺書已先燬矣其送錢梅溪黃河歸棹圖云我留黃河邊送君黃

河口黃河八月水連天白日蛟龍挾風走因君寄信報平安家有高堂可健餐春來

北望長安去愁絕天涯行路難杭州留別崔別駕曹呂兩明府何中翰兄弟云我來

十日天雨雪亂夢西湖行不得此間名士如名山多半聞名嬾相識杭州別駕清河

崔遣騎召客飛金鑿錢唐縣中兩仙令梅花散落瓊筵開何家兄弟多相好衝泥日來

破愁惱約放孤山招鶴船滿地白雲寒可埽寄袁簡齋太史金陵云金粟青蓮前後

身蓬萊淪謫記揚塵人誇勝地添詩伯天許清時作逸民六代煙雲牕下藁滿山花

月杖頭春他年擬買青溪棹來結先生松鶴鄰又云姓氏真疑前代客語言妙是一

家詩又云偶思采藥穿雲去小夢游仙帶鶴還又寄簡齋文云聞道先生能據鞍春

來還著遠游冠篋中自補新詩句湖上重尋舊釣竿隔歲書期今歲約老年花當少年

看東山裘屐饒絲竹多少林泉望謝安贈鮑若洲云松石心期雲鶴姿幾年不見鬢

添絲。長安卿相皆同學。好賦青山招隱詩。荷花生日詞云。荷花風前暑氣收。荷花蕩口碧波流。荷花今日是生日。郎與妾船開並頭。又云。金壇段郎官長清。臨風清唱不勝情。怪郎面似荷花好。郎是荷花生日。生晚泊云。三尺涼篷漁父家。夕陽西岸淨雲沙。水邊無數野蝴蝶。飛入一溪紅蓼花。代簡齋太史答潘校書云。八十華顛千里路。後期重訂謝紅妝。餘杭酒熟吾還記。只恐麻姑鬢有霜。桃源云。石勢連天雲樹新。一條飛澗碧粼粼。曾經親到桃源洞。只見桃花不見人。惆悵溪云。清泉白石點蒼苔。小洞桃花門不開。我有平生惆悵事。那堪重到此溪來。寄楊巡道揆蜀中二首云。早獻長楊動

帝閣

步隨飛將戰龍蕃。碑題大字磨星石。箭涉全軍返玉門。投筆西征

思定遠。薦賢東閣待公孫。閒來愛讀英雄傳。尊酒何年與細論。其詩人戎帥兩難逢

三十功成鎮蜀中。此夕懷君隔明月。當年令伯有清風。

笠湖文宦蜀有聲

江盤古木琴臺綠

花擁春輿劍閣紅。漸覺杜陵傷老大。久判潦倒遠從公。其豔陽曲云。何處豔陽晨。秦

淮最好春。潮痕百花酒。山色六朝人。香劈鷓鴣碎。詩題蛺蝶新。燭房蟾魄落。猶動繞

梁塵。過羊祜故里云。羊傳祠堂舊。松林驛路新。世途方黨錮。夫子不醜人。裘帶瞻遺

像。雞豚罷賽神。有碑堪墮淚。豈獨峴山春。新年口號云。春酒醉春盤。親知滿座看。新

年折新柳。都為上長安。蘿谷云。蘿陰連澗戶。松葉覆茅廬。對酒一牕小。青山如異書。